

Дунияллийн Эса МасихИ уккаву

1 Га ппурттуву кьайсар Августлул амру бувну бур щала паччахІлугърай ялапар хъанахъисса инсантурал сияхІ дан. 2 Му хъхъичІра-хъхъичІсса сияхІ дуллалисса чІумал, Шамуллал сардарну Квириний ивкІун ур. 3 СияхІрай цала цІа чичин даншиврул, гьарца инсан цала-цала шагърулийн гъан багълай бивкІун бур. 4 Лавгун ур Галилайнавусса Назарет шагърулия Ягъудинавун, БатлахІим тІисса Давудлул шагърулийн Юсупгу, цанчирча га Давуддул авладраясса ивкІун ур. 5 Ца чичин дан ганал цащала бувцуну бур оьрчІ лякълувусса буцай душ Мариянгу. 6 Гай БатлахІимрай бунува, Марияннун оьрчІ бан чІун дирну дур. 7 Увну ур ганин цалчин арс. Цулцугу увну, ивхъуну ур га тІулунттуву, цанчирча гайннан гъантта бикІансса къатта къавхъуну бур. 8 Га хъхъуну арх бакъа чулданий яттичІа гузатрай хІухчалт бивкІун бур. 9 Цакуну гайнначІан Заннал малаик ливккун, Заннал чаннал нур гайннайн дагъну дур. Гай хъину ццах куну бур. 10 «Нигъа мабусари, - куну бур малаикнал гайннахъ, — на зучІан агъали ххари хъунсса хавар лавсун увкІра: 11 хІакъину Давудлул шагърулий увссар зува ххассал бантІисса Хъунма — МасихІ. 12 Зун га укун увчІинтІиссар: га зун лякъинтІиссар цулцугу увну, тІулунттуву ивхъуну». 13 Цакуну га малаикначІан ссавруннай буцири малаиктал ливккун, Зал бюхттул уллан бивкІун бур: 14 «Ссавруннайминналгу Зал бюхттул улланнав! Аьрщарайгу Заннал нур лахъан даннав Цанма ххираминнал дакІурдиву!» 15 Малаиктал гичча ссавруннайн зана шайхту, хІухчалт цаннахъ ца тІун бивкІун бур: «Бачияра, БатлахІимрайн лавгун, Заннал жунма баян бувсса ва ци иш бури ххал баннуча». 16 Лавгунгу бур гай анаварну, ххалгу хъуну бур Юсуп ва Мариянгу, тІулунттуву ивхъусса оьрчІгу. 17 Га ккаккайхту, бувсун бур хІухчалтрал оьрчІая малаикнал цахъва увкумур. 18 ХІухчалтрал бувсумур бавсса, циняв хІайран хъуну бур. 19 Марияннул тІурча хІухчалтрая цинма бавмур личІлулну лалавсун бур. 20 Лавгун бур хІухчалтгу махъунмай, цанма малаиктурая бавмур тасттикъ хъуну тІий, Залгу бюхттул уллай, КІанайн щукругу

буллай.